

Nasihat Sultan Johor kepada graduan UTHM

BATU PAHAT - Sultan Johor, Sultan Ibrahim Almarhum Sultan Iskandar menasihatkan golongan graduan supaya tidak menyalahgunakan ilmu dan kebolehan untuk perkara tidak berfaedah seperti menipu dan mencuri.

Baginda mengingatkan graduan supaya tidak terlalu terikut-ikut dengan pengaruh rakan-rakan yang cetek akal atau bersikap sombong dengan ilmu pengetahuan dan kelebihan yang dimiliki oleh mereka.

Baginda turut meminta golongan graduan supaya tidak terlalu memilih pekerjaan sehingga ada dalam kalangan mereka sanggup

menganggur dan menyusahkan keluarga.

"Kehidupan di dunia ini memang banyak cabaran dan tiada jalan pintas untuk berjaya, kita mesti bermula dari bawah dengan mencari pengalaman kerja, meningkatkan kemahiran dan kebolehan untuk kualiti diri," titah baginda.

Sultan Ibrahim, yang juga Canselor Universiti Tun Hussein Onn Malaysia (UTHM), bertitah demikian pada Majlis Konvokesyen UTHM ke-16 di Dewan Sultan Ibrahim, dekat sini semalam.

Dalam majlis tersebut, baginda berkenan menganugerahkan Ijazah Doktor Falsafah (Pengurusan

Harta Tanah dan Fasilitas) kepada Gabenor Sulawesi Selatan, Indonesia, Dr. Syahrul Yasin Limpa.

Selain itu, Sultan Ibrahim turut berkenan menyampaikan anugerah gelaran Profesor Emeritus kepada Prof Datin Dr. Maryati Mohamed dan kepada Prof Dr. Jalani Md.Yunos, masing-masing dari Fakulti Sains, Teknologi dan Pembangunan Insan dan juga Fakulti Pendidikan Teknikal Dan Vokasional, UTHM.

Sejumlah 3,469 graduan menerima ijazah dan diploma masing-masing pada majlis konvokesyen yang bermula semalam hingga Isnin ini. - Bernama



SULTAN Ibrahim berkenan menyampaikan anugerah Sultan Ibrahim kepada Muhammad Nur Annuar Mohd Yunos, 24, pada Majlis Konvokesyen ke-16 UTHM di Dewan Sultan Ibrahim UTHM semalam.